

Cama Tsətsəfə Nə Bulusu Nə Tanggərma Anə Timathlawusu

Usa Dzau

¹ Sara ara Bulusu, cama səsə nə Kərsiti Yesu lagur ngga nə Hyal ndər mbəda mən ənga Kərsiti Yesu ndər fə dəfu anə mən,

² Nga vər tsəfə anə Timathlawusu zər də nə jiri wu lagur mbərsa.

Mayiwakur ənga təhudəu ənga jaməkur sara ara Hyal Tada ənga Kərsiti Yesu Thlagər mən a nggya ənga gau.

Kughi Ar kəra Highiḅə Nə Fati

³ Ənggəra yi tsətsəkur ngau ar pəci kəra ya vər ma'yi a ndu Masidoniya, yu yiwu ga ḅəliya sar kushu wu Afisa aga ga kughiya njir highiḅə nə fati aga nda piyari.

⁴ Ga nar nda abər a sara nda hə hangəkalər nda a ndəgya pumungutu'yar kəra gəra ənga kər ba ənga jiga thləmər ciji'yar, kəra tsu kudīya nyi a'yi mai. Arya culi najaka sə wu shili ənga kəpal wacu, ar viya thlər Hyal kəra wu shili lagur mbərsa.

⁵ Səra najaka ndər ar kəri ca ngə yiwudzau, kəra wu shili lagu dəfu cicau, ənga dəhə nə dəfu kəra a vər cabiya abər a'yi mən ənga bikə mai, ba ənga tsu mbərsa kəra pakatəu.

⁶ Alenyi nji a thlənar nda dzə sara ara najaka jiri, kəra təkəri ndə shabiya dzau, ndu nu ndər paməpamə nə kurthləu.

⁷ Ndu yiwu nda da maləmə nə dladau, ya kəja nandə wu səni sərə ndu ndər arya nyi kə mai, alaga sərə ndu na anə nji gərə ənga hivər.

⁸ A sən mən abər dladə sə mənəhə ngau, ma nji məl thlər ni tsatsa'a.

⁹ Namən tsu wu səni abər dladau, nji lər nyi anə nji cici mai, ama anə njira gərə bəla dladau, ənga nji batal, ənga njira gərə hivər Hyal, ənga njir bikə tsu, ənga njira gərə cicau, ba ənga njira gərə nu Hyal, ənga njir tsa dərnda ənga mər nda ba ənga njir tsa nji,

¹⁰ ənga tsu njir məl səsukur, ənga shili kərə wu pida ənga shili kuvwar nda ənga mathləkə'yi kərə wu pida ənga kuvwar nda, ənga njir həl nji, abangə tsu njir thla fati, ənga njir lə sakida nə fati, ənga kalar sərə pamə ənga highiḅə nə jirkur.

¹¹ Abər najaka highiḅə nə jijiri wu shili lagu ndəshigu dlədləvə nə Hyal kərə ənga barka, kərə ji fuwa da wu tsa yi aga ya tətəlna.

Usaku Arya Mayiwakur Nə Hyal

¹² Yu usa Kərsiti Yesu Thlagər mən, ndəra nə da dənəma aga məl thlər kau, arya ji hər da ndəra nja fər kər ni, ənga ji cadəbiya da a shili wu thlər nyi.

¹³ Alaga kə dədəmə nayi ndər vazə Hyal ngau, ndər ka thlər nyi ara ɓau, ənga tsu ndər dida nyi. Ama wu sə'yar kə patə kə yi uya tuhudu ara Hyal ara yi məl nda wu gərə sənkur ənga gərə mbərsa.

¹⁴ Mayiwakur nə Thlagər mən nyabiya da gangə gagadau, daḅə ənga mbərsa ba ənga yiwudzə kərə a'yi wu Kərsiti Yesu.

¹⁵ Ndər kərə yu nda na kau, ndər kərə nja fiyafə əni ngau, kərə tsa'a nja dləwuri patəu, abər, “Kərsiti

Yesu shili wu duniya aga mbəda njir bikau,” wu pama nda patə nayi nga ndiya ənga bikau.

¹⁶ Ama ənggau ca ngə da Hyal cabiya da tuhudə nyi, nayi ndəra ndiya ənga bikau, aga Kərsiti Yesu a cabiya munya nyi aga ya da ndər ca lagu anə kalar ndəra wu nda hənggəri ənga ja nga ndu uya pi gəra kudau nə ba'anuwə.

¹⁷ Bəgau dəgalkur ənga dləvau nda nggya nə ngau təl gəra kudau nə ba'anuwə, ndəra gəra ənga kudiya, ndəra gəra nju lari, ətsu nagə ngə Hyal zəmə wacu nə ba'anuwə! Aminu.

¹⁸ Timathlawusu, zər də, yu lə ndər kau anə ngau ar kəra ndər kəra nabi'yar nana ar kəra gau dədəməu, aga lagur nu nda, gu nda də ndər məl thlər mənəhəu gəgəda.

¹⁹ Nagə tsu ga səbiya mbərsa ngau ənga dəhə nə dəfu kəra mənəhəu, arya alenyi nji a tsiyari mbərsar nda lagur nggəl ara nu dəha dəfuwa nda.

²⁰ Wu pama nda ca ngə Himaniyasu ənga Alegəzanda, njira yi lər nda anə shatan aga nda highiḃəri nda sara dida ndər Hyal.

2

Highiḃau Ar kəra Dləvau

¹ Sə tanggərma, yu tsətsəku ngau, aga nja dumwa ənga kədiyau, ənga ndər ənga Hyal, ənga nja dumwa ənga usa Hyal arya nji patəu.

² Nja kyaga məl abangə ar viya təltəl'yar patəu, ənga patər njira a miya thlər dədəgaləu. Nja məl abangə tsu aga mənə uya nggya jaməu ənga hudə pipida wu hivər Hyal ba ənga nggya cicau wu mwar Hyal.

³ Naja kau mənahə nga nyi, ənga tsu Hyal ndër mbəda mən wu nggari məsahəkura nyi,

⁴ ndəra wu yiwu patəkura nji nda uya mbəda, ənga nda shili wu sənbiya jirkur.

⁵ Arya Hyal zəmə ngau, ndəra wu pama Hyal ənga nji tsu zəmə ənga ja, ndə kau, naja ngə Kərsiti Yesu.

⁶ Naja ngə lər kərnyı aga ja pəliya nji patəu. Najakə ngə cama kəra Hyal ləri anə duniya ar pəci kəra kakaləu.

⁷ Aga kə ngə Hyal cadəbiya da cama səsau ənga tsu ndër tətəlna ndër Hyal. Yi da maləmə highibau anə patər njira a'yi njir Yahudiya mai, ar kəra mbərsa ənga jirkur. Jiri nga yu na a'yi fati mai.

⁸ Yu yiwu shili ar kalar vi nda har tsi a dəməlmau wu cicikur, wu kədi Hyal, a'yi ənga dəfu ndzəndzə mai, ba a'yi ənga kəpal wu dəfu mai.

⁹ Yu yiwu tsu mathləkə'yi nda hari kar kəra tsa'a, lugutu kəra kyau, a'yi ənga gangəkur məl shishir kər mai. Ənga tsu a sara nda ha kar dinairi mai, ba ənga thladla ənga kar nə gənna gangə mai.

¹⁰ Ama nda nggya ənga nggyabiya mənahəu kəra wu kyaga mathləkə'yi kəra cabiya kərnda abər nanda njir hivər Hyal ngau.

¹¹ Bəgə mala ja dləwuri najaka highibau wu hangəkəl nyi ba ənga həya kər nə jijiri.

¹² Nayi nə nyi lagu anə mala ja highibə anə ndə sal mai. Nayi tsu nayi nə nyi lagu anə mala ja səm təkur a dar kəra shili mai, bəgə ja nggya zəməu.

¹³ Arya Hyal məliya Adamu tanggərma divira Hawawu.

¹⁴ A'yi Adamu ngə shatan nggutana mai, ama mala nyi nga ji nggutana, ba ji da ndër bikau.

¹⁵ Ama mathləkə'yi ndu nda uya mbədaŋ lagur ya wazha, ma ndə sən dumwa ənga mbərsa, ənga yiwudzau, ənga cicikur dabə ənga tsərpər kər.

3

Nggyabiya Kəra Wu Kyaga Ndər Tədəmwa

¹ Kəja ndər kəra nja fər kər əni, kalar ndəra vər cim ja nggya ndər tədəmwa anə njir nu, a cimər ja thlər kəra mənəhəu.

² Ndər tədəmwa ja nggya ndəra gəra ənga səra nja vazə nyi ni a dumwar nji, ja da ndər mala zəməu, ndər bəlar kərny, ndər dəfu mənəhəu, ndəra ənga hangəkal mənəhəu, ndər dləwu məthləpi, ndəra wu sən highiəu gagađau.

³ Najaka ndau a'yi ja ndər nyi ənga padlə mai, ənga a'yi ja ndər gal pa mai, ama ndə hangəkal, ənga tsu a'yi ndər tsətsəbwari mai, ətsu a'yi ndər yiwu gənna gagađə mai.

⁴ Pakatəu kəl ji da ndəra sən səbiya ki nyi mənəhəu, ju məliya wazha nyi nda məl səra ju na ənga nda gənggər nyi səli wu kalar lagu.

⁵ (Ma ndau a'yi a sən ənggəra ja ɬau ənga njir ki nyi mai, abari nga ja sən bə ənga njir nu Hyala?)

⁶ A sara ja da ndəra dzəgwa da ndər nu Hyal mai, ara ɬwadzau a nda səwa nyi ba nja məliya nyi numa kəra nji məliya nyi anə shatan.

⁷ Ndər tədəmwa ja da ndəra nja ndər mənəhəu ar kəra ja wu mwar njira a'yi njir nu mai, a sara da sər səli, ənga ja tədaŋ a gu ləbam shatan.

⁸ Abangə tsu njir dləwa pubu, pakatə nda nggya njira nju gənggər nda səli, a'yi njir pə miya

məməthlu mai, ənga tsu a'yi njir nyi ənga padlə mai, ənga njir suna gənna mai.

⁹ A mbari anə nda, nda səbiya jirkura mbərsar nda ənga kər papaləu.

¹⁰ Sə tanggərma nja dzəbiya nda, ənggau, ma nja 'yi thləwa nda ənga vanyi vazə mai, bəgə nda də njir dləwa pubu.

¹¹ Abangə tsu mathləkə'yir nda, nda də njira nju gənggər nda səli, a'yi njir ndər nə gwadəvi mai, ama njira tsərpəri kərnda, ənga wu kalar sau, nja fər kər ənga nda.

¹² Ndər dləwa pubu kəl ji də ndər mala zəməu, ənga ju sən səbiya wazha nyi ənga njir ki nyi mənəhəu.

¹³ Njir dləwa pubu kəra wu məl thlər nda mənəhəu, ndu uya thləmə mənəhəu anə kərnda, ndu ndər gəra hivər ar kəra mbərsar nda wu Kərsiti Yesu.

¹⁴ Ar pəci kəra ya vər tsəfə cama tsətsəfə kau a nda anə ngau, yu fə dəfu abər yu shili əgya gau a səkari kushu.

¹⁵ Ama ma a'yi yi shili kadə mai, ga nggya ənga səni ənggəra mənə kyaga nggya wu pama nji gə Hyal, kəra ca ngə dəbə njir nu nə Hyal mbəmbədəu, ca ngə shimal ənga fə hya jirkur.

¹⁶ A'yi ənga təkəkər mai, sə kə mənə vər nu kau dəgal nga nyi:

Kərsiti cabiya kərnyi wu kumər dzau,

Mambəl cabiya nyi ndər jiri.

Waladi'yar lari nyi,

nji tətəlna ndər nyi wu duniya.

A hənggəri nji ənga ja wu duniya patəu,

Hyal həri nyi a dəməlmau wu kadakadarkur.

4

Highibau Nə Fati

¹ Kəja Mambəl Cicau a vər ca ar babal abər wu kudiyar pəci, alenyi nju nda səna mbərsar nda ar viya njir nu ba nda hər hangəkala nda a ndəgya mambəl ngguta vi ənga highibə nə fati nə mambəl dəmwa'yi'yar.

² Highibə kau wu nda hya'ari lagur nji batal njir thla fati kəra dāhə dəfuwa nda a təri, ənggər səra nji hilina ənga liyangə kwakwadəu.

³ Culi nji kau ndu ka hə dzau, ənga tsu səm alenyi sər səm. Ətsu, Hyal ngə məliya sər səm kau aga njira mbərsa ənga tsu njira wu sənbiya jirkura nyi nda dləwuri ənga usaku.

⁴ Arya kalar səra Hyal məliya mənəhə nga nyi, ənga tsu a sara nja piyari sə mai ma a dləwuri nji ənga usaku,

⁵ ara a cinar nji lagur ndər Hyal ənga lagur ndər ənga Hyal.

Ndər Məl Thlər Kərsiti Yesu Kəra Mənəhəu

⁶ Ma ga highibər sə'yar kau anə wazha ama, gu nda da ndər məl thlər Kərsiti Yesu kəra mənəhəu. Nagə ndəra hau wu ndər kau nə mbərsa ənga tsu highibə nə mənəhəu kəra ga vər nu ba'anə əshina kau.

⁷ Ga sara bəkər ngau ənga kəbəkəwatəu ənga pumungutu gəra kər, kəra gəra ənga dləwa dzau. Ama ga hwathliya kərngau ga nggya ənga dəfu nə Hyalkur.

⁸ Alaga kau, hwathlə dzə nə kumər dzau a'yi ənga akkəri tsapə mai, ama ga nggya ənga dəfu nə Hyalkur ca nga ndiya ənga akkəri wu kalar lagu.

Ara najakau, wu shili ənga barka kabangəkau ba ənga tsu nggya kəra wu nda shili.

⁹ Najakə ngə ndər kəra nja fər kər ni, ənga tsu a təkəri nja dləwuri ənga hudə zəməu.

¹⁰ Aga kau 'ya vər nərdzau, 'ya vər məl thlər ara a fuwar 'ya dəfuwa 'ya wu Hyal kəra ənga pi, ndəra ca ngə ndər mbəda patər nji, njira ma a hənggər nda jiri ənga ja.

¹¹ Ga highiḃə sə'yar kau, ənga ga nar nyi anə kalar ndau ja məl sərə gu na.

¹² A sara ga hənggəri nda didana ngau ara nagə zər baduwari mai, ama ga cabiya kərngau sər highiḃau anə njir nu lagur ndər ngau, ənga nggyabiya ngau, ənga yiwudzə ngau, ənga mbərsa ngau, ba ənga tsu nggya cici ngau.

¹³ Kadivira ya shili, ga dumwa ənga jiga ndər Hyal kəra tsətsəfau anə ndapi, ənga tətəlna ndər Hyal ba ənga highiḃə tsu.

¹⁴ A sara ga piyari barka nə sən sau kəra Hyal nə ngə kə mai, kəra ji nə ngau lagur cama sara ara Hyal ar pəci kəra dəbə dzər njira nggurəm fənggər ngə tsi.

¹⁵ Ga məl sə'yar kau ənga jirkur, ga lər kərngau papatəu anə nda, aga kalar ndau ja lari ənggəra ga vər cakau.

¹⁶ Ga bəlar kərngau ənga highiḃə ngau gagadau. Ga dumwa ənga məl thlər 'yar kau ənga hudə zəməu, ara ma gə məl abangau, gu nda mbədana kərngau ənga njira wu səhimi ngau.

Highiḅau Ar kəra Mathləkə'yi Təsal, Njira Ng-gurəm Ənga Mafa'yar

¹ A sara ga kughi anə ndəra dəgal a ndiya ngau ənga hūdə ndzəndzə mai, ama ga ndər anə nyi ənggər anə dəngau. Wazha baduwari tsu ga kughiya nda ənggər anə zamə ngau.

² Anə mathləkə'yi hahal tsu ga ndər ənggər anə mə ngau, anə ku'yi tsu ga ndər ənggər anə kwamə ngau, ənga cicikur dəfu nə jiri.

³ Ga ləri dəgalkur anə mathləkə'yi təsal, njira ənga jiri njir dləwa nda a'yi mai.

⁴ Ama ma mala təsal a'yi ənga wazha ənga ciji, bəgə nda dzəguya highiḅəri səra sər nur nda na aga nda məl anə njir kir nda. Lagu kau nga ndu nda kina anə njir yar nda dləwa dzau kəra ndə uya sara ara nda. Culi kau, mənəhəu nga nyi anə Hyal.

⁵ Mala təsal nə jijiri, kəra ndər dləwa nyi a'yi mai, ju fiya dəfuwa ja wu Hyal, ba ja dumwa ənga ndər ənga Hyal ju gal dləwa dzau sara ara ja vu'yi ənga pəci.

⁶ Ama mala təsal kəra wu nggya aga səm məsahəkur wacu, tətə nga ja, alaga kə tsu ja 'yi ənga pi kau.

⁷ Ga nə nyi najaka cama anə njir nu, aga nda də njira gəra ənga sər vazau wu mwar nji.

⁸ Kalar ndəra gəra sən səmənə nji nyi, ma na ma njir ki nyi, a bəl nar ja mbərsa nyi, najaka ndau a ndiyar ja ndəra gəra ənga mbərsa ənga dəmwa'yu.

⁹ Mala təsal a'yi kari nja jigəwa nyi pathləu wu pama mathləkə'yi təsal mai, kəl ma fa nyi a ndiyari fa kwakumunyi Ba tsu ar pəci kəra sal nyi tsu ənga pi a nggyar ja mala tsapəu anə nyi.

¹⁰ Ənga nju sən nyi ənga sər mələ ja mənəhəu. Ənga mala kəra həri wazha nyi wu lagu mənəhəu, ənga ju dləwu məthləpi. Ənga ju məl thlər anə nji cici gə Hyal, ba tsu ju dləwa njira wu yiwu dləwa dzau. Ənga ji ləri kərny i aga məl kalar səra mənəhəu.

¹¹ Ama mathləkə'yi təsal kəra tsu yidəfəu, nja jiga nda wu nji kə mai. Arya ar pəci kəra cim nə kumər dzau təkəbiya hangəkala nda ənga Kərsiti, ba nda gal lagur hə sal.

¹² Lagu kau nga ndu dla ənga numə anə kərnda, ara a bəlnar nda alkawal nə tanggərma.

¹³ A'yi kə ma waci mai, ama ndu highiḃəri nggya nggashu, ənga ndu ḃəḃau a ndu ki nji. A'yi kə waci mai, ama daḃə ənga na ndau, ənga ndu ndora ba na sə kəra gəra kyau.

¹⁴ Cimə də, mathləkə'yi təsal kəra tsu nda yidəfə nda hər sal, nda ya wazha, nda səḃə kir nda. Ara nda sara nə nyi anə dawar mən lagu nə ndər dəmwə'yi ar kəra mən.

¹⁵ Ara alenyi mathləkə'yi təsal nər nda a shar nda tsu kadəu, nda vər nu shatan.

¹⁶ Ma mala kəra ənga mbərsa a'yi ənga mathləkə'yi təsal wu ki nyi, ja dləwar nda, a sara nja nə nyi ḃwaḃwatə anə njir nu. Lagu kau ngə njir nu Yesu wu nda uya lagur dləwa njira mathləkə'yi təsal nə jijiri.

¹⁷ Njira nggurəm nə njir nu kəra wu məl thlər nda mənəhəu, a kyau nja gənggər nda səli gagadau, ma na njira thlər nda ca ngə tətəlna ndər Hyal ənga highiḃau.

¹⁸ Ara ndər Hyal kəra tsətsəfə nana, “A sara nja fuwa njuwangə wu miya thla zəwa ar pəci kəra ja

vər məl thlər mai,” ənga tsu “Ndər məl thlər a kiri nja nə nyi sərə nə nyi.”

¹⁹ A sara ga səhimi ənga vazə ar kərə ndə dəgal nə njir nu mai, kəl ma gə nggari wu miya sakida a də məthlə ənga alaga makəru.

²⁰ Njira məliya bikau, ga kughiya nda ar babal, aga alenyi nja gərahau.

²¹ Wu mwar Hyal ənga Kərsiti Yesu ənga wal-adi'yar cacadəu, ya vər kughi anə ngau, ga nu highiḃə'yar kau gərə ənga tazhira abər gu yiwu vanyi ndau a ndiya alenyi nji.

²² A sara ga kusa ənga fə tsi nə barka ar kərə ndə mai. Ətsu a sara ga fuwa kərngau a gu bikə nə alenyi nji mai. Ama ga ḃəlar kərngau cicau.

²³ A sara ga dumwa ənga sa 'yimi hyalagəu waci mai, ama ga tuwari 'yimir wur inabi kərə mwushu kushu ara səhudə ngə kau, ənga tsu ara hwah-wafəkur ngə kau.

²⁴ Bikə nə alenyi nji ar babal nga nda, kərə kalar ndu səni sərə nda a gwa divira nja thlana nda numa. Ama bikər alenyi nji dədəwa nga nda kəl wu yukudə nga ndu nda biyar babal.

²⁵ Abangə tsu thlər kərə mənəhəu ar babal nga nda, alaga ma a'yi nda ar babal mai, nandə wu sən dəwanakər mai.

6

¹ Patər njira vər səm mafakur, nda kyaga ləri dəgalkur anə tarkir nda kərə tsa'a, ara nja sara ndər nə dida anə thləməhər Hyal nga highiḃər mən.

² A sara mafa'yar kərə tarkir nda njir nu Yesu ngau, nda nggəl ara lə dəgalkur anə nda, ara nanda zamər nda mai. Ar viya kau, kuji kə mafa'yar kau

ḡəra cakəri mbiya dəfu nda məl thlər nda mənəhəu ara tarkir nda njira wu nu Yesu ngau, njira wu uya barka sara wu thlər nda ənga tsu tarkir nda wu yiwu nda. Sə'yar kau nga gu highiḡau ənga ga tsətsəku dəfuwa nda aga nda məl.

Highiḡə Nə Fati Ənga Akkəri Nə Jiri

³ Kalar ndəra wu highiḡau, highiḡə nə fati, ənga a'yi ju hənggəri ənga highiḡə nə mənəhə nə Thlagər mən Yesu Kərsiti ənga highiḡə nə Hyalkur mai,

⁴ naja ndər ḡwasau ənga ndəra gəra sən sau. Naja tsu ju nggya ənga dəfu nə dəmwa'yikur ənga ju yiwu kəpal ənga shasha ndər ar kəra ndər 'yar, kəra wu shili ənga shishikur, ənga madəkur, ənga nggəl ndau ba ənga dənga dəmwa'yi kəra gəra kər,

⁵ ənga kəpal gangə ənga njira dəngar nda a dəri nə kurthləu, njira jirkur a piyari ndari. Nanda ngə njira wu nggani abər nu Hyal ca ngu shili ənga uya gənna.

⁶ Gəra ənga təkəkər! Uya akkəri a'yi gangə gagadəu anə njira wu hivər Hyal ənga hudə pipida ənga səra ara nda.

⁷ Arya sə a'yi mən shili ni wu duniya kə mai, ənga sə a'yi mənə sən biya ni tsu mai.

⁸ Ama ma a'yi mən ənga sər səm ənga kar ha, kə ma a citəri.

⁹ Ama njira wu yiwu nda dā njir bərba ndu gwu dzau ənga ləbam shatan. Ndu yiwu sə dzadza ənga suna suna paməpamə nə kurthləu, ca ngə dla ənga sə ndzəndzau ənga ndə sanakər.

¹⁰ Arya yiwu gənna naja ngə nggilang ənga patər səra dəmwa'yu. A vər gal gənna ənga kusa ngə alenyi

nji tana lagur mbərsar nda, kəltə ndə fuwa kərnda wu hudə ndzəndzə gangə gagadau.

Bulusu Tədar Himiya Timathlawusu

¹¹ Ama nagau, ndə nə Hyal, ga hwinakər nadəu sara ara sə'yar kə patəu. Nagə tsu ga fuwa kər wu gal sərə mənəhəu, ənga nə Hyalkur, ənga mbərsa, ənga yiwudzau, ənga səsə'wuri sau ba ənga hangəkalkur.

¹² Ga pana pa nə mənəhəu, ca ngə pa nə mbərsa. Ga səbiya pi, pi gərə kudəu kərə ca ngə Hyal ngga ngau aga nyi ar pəci kərə gə nana ənggərə gə mbərsa a ndumwar sakida gangə gagadau.

¹³ Yu kughiya ngau wu mwar Hyal kərə nə nyi pi anə kalar sau, ənga Kərsiti Yesu, kərə ar pəci kərə ja vər lə sakida wu mwar təl Buntusu Bilatusu ji nana ndər kərə jiri,

¹⁴ abər ga səbiya sə kə yi nar ngə kau gərə ənga sər dəba ənga sərə nja nggəliya kəl pəci kərə Thlagər mən Yesu Kərsiti shili ari.

¹⁵ Naja ngə Hyal wu nda həri a shili wu pəci nə kərny. Hyal kə ngə ndər barka ənga naja ngə ndəra ndiya ənga dənəma patəu, naja ngə təl nə tətəl ənga Thlagər thlagə'yar.

¹⁶ Naja wacu ngə gərə tau, ənga ju nggya wu mbəmbəl kərə ndər sən ləhəri a'yi mai. Naja nga nji gərə saya lari ənga ndər sən lari nyi a'yi mai. Anə nyi ngə kadakadarkur ənga təlkur ba'anəwa. Aminu.

¹⁷ Ga nar nyi anə njira ənga gənna wu duniya kabəngəkau, abər a sara nda bəwadzə nə mai, ənga nda sara fə dəfuwa nda ar gənna kərə wu bəliya sar mai. Ama nda fər dəfuwa nda anə Hyal ndəra wu

nə mən kalar sau ənga tsi bangəu aga nggyar mənə da məsahəu.

¹⁸ Ga nar nda aga nda məl sərə mənəhəu, ənga nda cakəri məl thlər kərə mənəhəu, ənga nda pahəna tsa nda aga dləwa kuvwar nda.

¹⁹ Lagu kau ənga ndu nda fiya akkərir nda a dəməlmau kərə wu nda da ənggər sər fə hyi kərə ndu nda nggya ar kəri wu fa kərə wu shili kau, aga nda nda uya pi kərə ca ngə pi nə jijiri.

²⁰ Timathlawusu, ga bəlari sərə Hyal fuwa wu tsa gau. Ga həbiya kərngau sara wu ndər kərə papatagəu nə dida ndər Hyal, ənga highiəu kərə nju nggani abər sənbiya sə ngau ama ndər fati ngau.

²¹ Lagur nu najaka highiəu, ngə alenyi nji təkəbiya dzau ənga mbərsar nda.

Bəgə mayiwakur nə Hyal a nggya ənga hyi.

Ndəshigu'yar Fodəu Ənga Thlər Cama'yar
The New Testament in the Marghi South language of
Nigeria: Ndəshigu'yar Fodəu Ənga Thlər Cama'yar

copyright © 2024 The Seed Company

Language: (Marghi South)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

63471087-0de7-5f4b-aa1f-ca2e66571a95